



ZARAUZKO UDALA

**ZARAUZKO UDALERRIKO BIDE PUBLIKO JAKINETAN IBILGAILUEN
APARKAMENDUA ARAUTZEKO ORDENANTZA.
(2021eko apirileko berrikuspena)**

1. artikulua. Xedea

Ordenantza honen xedea trafikoa antolatzen eta hobetzen laguntzea da. Horretarako, leku eta denbora mugak ezarriko dira zerbitzu partikular edo publikorako erabiltzen den 3.500 kg arteko edozein ibilgailu bide publikoko leku edo zonetan eta bertan jarritako aparkalekuetan aparkatzeko.

Helburua da oreka handiagoa lortzea herriko hainbat zonatan aparkatzeko dagoen eskaintzaren eta eskariaren artean. Helburu hori lortzeko, Udalak bere kabuz edo zerbitzu hori emateko kontratatutako enpresen laguntzarekin bete ditzakeen mugatze, kontrol eta inbertsio jarduerak garatu dira.

2. artikulua. Zonak eta seinaleak

Araubide berezi honen xede diren zonak Ordenantza honetako planoetan jasota daude. Zona horiek behar bezala seinaleztatuko dira, eta seinale bertikalak (ahal den lekuetan) eta horizontalak jarriko dira.

Udalbatzarrak ahalmena izango du zona arautuak eta horien izaera aldatzeko, baina alde zuzenetatik zona horietako bizilagunen parte-hartzea bermatuko duen prozedura beteko du.

3. artikulua. Ordainketa

Araututako aparkaleku moduan behar bezala seinaleztatutako leku edo bide publikoan aparkatzen bada ibilgailua, ordaindu egin beharko da, erabiltzaileak hala eskatzen ez badu ere.

Aparkaldi arautuko gunean aparkatzeko, baimena eskuratu beharko da, horretarako jarritako sistema erabilita eta dagokion tasa ordaindu ondoren. Baimen horrekin batera aparkatzeko txartel bat (tiketa) emango da, edo ez.

Aparkatzeko txartela (tiketa) ateratzea beharrezkoa den kasuetan, tiket hori ibilgailuaren haizetakoaren barruko aldean jarriko da, kanpotik erraz irakurtzeko moduan.

Dagokion ordenantza fiskalean zehaztu eta eguneratuko dira tarifak.

4. artikulua. Aparkamenduaren denboraldiak, indarreko ordutegiak eta gehienezko denbora

Bi denboraldi bereizten dira:

- a) Udaldia (ekainaren 1etik irailaren 30era, biak barne).
- b) Urteko gainerako egunak.

Zirkulazio-baimena Zarautzen duten ibilgailuek dohainik aparkatu ahaliko dute araubide arrunteko zona guztietan, 13:00etatik 16:30era. Aparkamendua baimentzeko txartela behar bada, dagokion tiketa atera beharko da.

Udalerrri osoan egoiliarrentzat gordetako zonak indarrean egongo dira eguneko 24 ordutan eta asteko 7 egunetan.

Aparkaldi arautuak **ordutegi hauek** izango ditu:

A) UDALDIA:

Udaldian, astelehenetik igandera, 09:00etatik 20:00etara.

Igande eta jaiegunetan, aparkamendu arautuko zona normal bezala arautuko dira errotazio handiko zonak, ondorio guztietarako.

B) URTEKO GAINERAKO EGUNAK:

Urteko gainerako egunetan, hauek egongo dira indarrean udalerrri osoan: errotazio handiko zonak, egoiliarrentzat gordetako zonak eta 1 zonako aparkamendu arautuko gune normalak.

Honakoa izango da **errotazio handiko guneetako eta araubide arrunteko zonetako** ordutegia: astelehenetik ostiralera, 09:00etatik 20:00etara, eta larunbatetan 09:00etatik 13:00etara.

Denboraldien hasiera eta bukaerako egunak eta zonen ordutegiak aldatu ahal izango dira, ezohiko izaeraz, zerbitzu teknikoek hala proposatuta, Alkatetzak edo, hala badagokio, delegazio edo deskontzentrazio bidez ari den organoak emandako ebazpen arazoituaren bidez.

Errotazio handiko guneetan aparkatzeko gehienezko denbora 90 minutukoa izango da, ibilgailu guztientzat.

5. artikulua. Salbuespenak

Ondorengo ibilgailuek ez dituzte ordainduko ordenantza honetan araututako tasak, adierazitako bide edo zonetan aparkatzeagatik:

- a) Motozikletak, ziklomotorrak eta bizikletak, baldin eta araututako aparkamendurako adierazitako plazak okupatzen ez badituzte eta horrelakoak aparkatzeko egokitutako lekuetan baldin badaude.
- b) Beren kategoriarako edo jarduerarako gordetako zonetan aparkatzeko udal baimena duten ibilgailuak.

- c) Zamalanak egiteko jarritako leku eta orduetan horrelako lanak egiten ari diren merkataritzako ibilgailuak.
- d) Autotaxi ibilgailuak, gidaria bertan eta zerbitzuan dagoenean.
- e) Hiletetako ibilgailuak, zerbitzuan daudenean.
- f) Larrialdietako ibilgailuak: anbulantziak, su-hiltzaileak, Gurutze Gorria, DYA eta polizia; horiek guztiak zerbitzuan daudenean.
- g) Barruan gidaria edo bidaiariren bat duen ibilgailu automobila, aparkaldia bost minutu baino gutxiagokoa denean.
- h) Mugikortasun urriko pertsonen jabetzako ibilgailuak edo bereziki egokitutakoak, zirkulazio baimena dutenak eta beren titularrek erabiltzen dituztenean, baldin horrelakoak aparkatzeko lekuetan aparkatuta badaude.
- i) Horretarako bereizgarria indarrean duten ibilgailuak.
- j) Zerbitzu publikoei atxikitako ibilgailuak, behar bezala errotulatu eta identifikatuak, benetan zerbitzuan daudenean.
- k) Zirkulazio-zerga Zarautzen ordaintzen duten ibilgailuek dohainik izango dute aparkaldiaren lehen ordu erdia araubide arrunteko zonetan edo zona urdinetan. Jarritako sistemak hala eskatzen badu, dagokion txartela atera beharko da (tiketa).

6. artikulua. Araubide bereziko aparkalekuak

Zerbitzua arautzeko, aparkaleku-araubide bereziko ondorengo zonak jarri dira, eta honakoen arabera arautuko dira:

1.- Egoiliarrentzat gordetako zonak:

Dagokion zonan bizi diren pertsonen ibilgailuak soilik aparkatzeko izango dira horrela seinaleztatutako gunek, betiere, 7, 8, 9, 10, 11 edo 12. artikuluetan araututako aparkaleku-bereizgarriren bat baldin badute.

1 zonako bereizgarria duten ibilgailuek Salberdin izenarekin ezagutzen den aparkalekuan aparkatu ahalko dute, azken zona horretan bizi direnen eskubide berdinekin.

2.- Errotazio handiko zonak:

Aparkaldia gehienez 90 minutukoa izango da ibilgailu guztientzat. Denbora hori igaro ondoren 16. artikuluan aurreikusitako neurriak aplikatuko dira.

Ibilgailu guztiek bete beharko dituzte zona horietan aparkatzeko denbora-mugak eta ordaintzeko betebeharra, bai eta ordenantza honetan aurreikusitako bereizgarriren bat duten ibilgailuek ere.

Araubide Bereziko Aparkalekuen kokapen zehatza, ezohiko izaeraz, Alkatetzak edo, hala badagokio, delegazio edo deskontzentrazio bidez ari den organoak emandako erabaki arrazoituaren bidez jarriko da, zerbitzu teknikoek hala proposatuta.

3.- Autokarabanak aparkatzeko zona:

Urte osoan funtzionatuko du. Ibilgailu horiek gehienez ere 3 egunetan aparkatu ahalko dira udaldian eta 5 egunetan urteko gainerako egunetan. Denbora hori igaro ondoren

ibilgailua mugitu egin beharko da. Ez da aparkatzeko baimen berririk emango, aurreko baimena bukatu eta 5 egun pasatu arte.

Zona horren kokapena aldatu daiteke edo zona bera aldatu, handitu edo txikitu daiteke, Alkatetzak edo, hala badagokio, delegazio edo deskontzentrazio bidez ari den organoak emandako ebazpen arrazoituaren bidez.

4.- Aldi bateko edo behin-behineko aparkalekuak.

Zirkunstantziak hala eskatzen duenean eta behar edo egoera bereziei aurre egiteko, aldi bateko edo behin-behineko aparkalekuak gaitu ahalko dira, zerbitzu teknikoek hala proposatuta eta Alkatetzak edo, hala badagokio, delegazio edo deskontzentrazio bidez ari den organoak emandako ebazpen arrazoituaren bidez.

Ibilgailuak gune horietan aparkatu ahalko dira, aurretik dagokion ordenantza fiskalean aurreikusitako tasa ordainduta. Aparkatzeko txartela (tiketa) lortzea beharrezkoa izan daiteke, edo ez.

7. artikulua. Egoiliarren bereizgarria

Oro har, etxebizitza bakoitzeko gehienez hiru egoiliar-txartel eman ahal izango dira. Hala ere, Udalak egoiliarrentzako aparteko bereizgarriak eman ditzake, mugikortasun urriagatik edo salbuespenezko beste arrazoi batengatik.

Egoiliarrentzako bereizgarria emateak dagokion Ordenantza Fiskalean jarritako tasa sorraraziko du.

Zarauzko Udalak egoiliar bereizgarriak emango dizkie honako baldintzak betetzen dituzten ibilgailuei:

- a) Ibilgailuaren titularra Zarautzen erroldatutako pertsona fisikoa izatea eta dagokion zonan inskribatutako etxean bizitzea.
- b) Probintziako Trafiko Buruzagitzak emandako zirkulazioko baimenean agertzen den pertsona hartuko da ibilgailuaren jabetzat.
- c) Ibilgailua Zarauzko Ibilgailuen Zirkulazioaren gaineko Zergaren erroldan alta emanda egotea eta aurreko ataletan adierazitako titulartasuna eta helbidea bat etortzea. Gainera zerga hori ordainduta eduki beharko da.
- d) Udalak jarritako trafiko isunik izanez gero, hori ordainduta izatea. Arau hau etxebizitza bereko ibilgailuei aplikatuko zaie, baldin horren titulartasun-aldaketarik gertatu ez bada.
- e) Dagokion Ordenantza Fiskalean egoiliarrentzako bereizgarria lortzeko jarritako tarifa ordaintzea.

1. zonako egoiliarrek aukera izango dute beren zonako edo 2. zonako bereizgarria lortzeko

8. Egoiliarren aparteko bereizgarria

Egoiliarren aparteko bereizgarria lortu ahal izango dute ohiko bizilekua Zarautzen izanik, bertan erroldatuta egon eta ibilgailua errentamendu finantzarioan (leasing edo

renting) duten pertsona fisikoek. Hori lortzeko, ondorengo baldintza guztiak ezinbestez bete beharko dira:

- a) Gidabaimena indarrean izatea.
- b) Ohiko helbidea Udal Erroldan eta gidabaimenean azaltzen den bera izatea, eta, benetan, dagokion zonaren barruan inskribatutako etxebizitzan bizitzea.
- c) Ibilgailuaren pisua gehienez 3.500 kg-koa izatea.
- d) Ibilgailuaren aseguruan ohiko gidari bezala azaltzea.
- e) Udalak jarritako trafiko-isunak ordainduta izatea, halakorik edukiko balu. Arau hau etxebizitza bereko ibilgailuei aplikatuko zaie.
- f) Dagokion Ordenantza Fiskalean bertakoentzako bereizgarria lortzeko jarritako tarifa ordaintzea.
- g) Leasing edo renting-aren kontratu originala eta ibilgailuaren aseguru-poliza aurkeztu beharko dira, baita agiri horien fotokopiak ere.

Talde horretan egongo dira enpresaren ibilgailua euren zerbitzura duten gidariak. Kasu horretan g) letrako betebeharraren ordezkariak honakoa aurkeztuko da: eskatzailearen eta ibilgailuaren enpresa titularren arteko lan-harremana frogatzeko agiria. Justifikatu beharko da enpresak baimena eman diola pertsona horri ibilgailua berak eskusiboki erabiltzeko, bai lanorduetan bai lanorduetatik kanpo.

9. artikulua. Jarduera ekonomikoekin lotutako ibilgailuen aparteko bereizgarria

Jarduera ekonomikoekin lotutako ibilgailuei aparteko bereizgarria eman ahal izango zaie ondoko baldintzak betetzen dituen eta dagokion zonan dagoen entitate juridiko edo fisikoari:

- a) Ibilgailuaren titularra pertsona juridiko edo fisikoa izatea eta jardueraren helbidea araututako zonan egotea. Gainera enpresa edo jarduera horrek jardueraren aurrekomunikazioa eginda eduki behar du Udalean, edo establezimendua irekitzeko lizentzia eduki behar du, edo jarduera legeztatze prozesuan dagoela justifikatu behar du.

Epigrafe honetan sartzen dira, baita ere, Zarauzko Udal Merkatuko salmenta-postu ez finkoetako adjudikaziodunak.

- b) Ibilgailua Zarauzko Ibilgailuen Zirkulazioaren gaineko Zergaren erroldan alta emanda egotea eta aurreko ataletan adierazitako titulartasuna eta helbidea bat etortzea. Gainera zerga hori ordainduta eduki beharko da.

Probintziako Trafiko Buruzagitzak emandako zirkulazioko baimenean agertzen den pertsona hartuko da ibilgailuaren jabetzat. Zarauzko Udal Merkatuko salmenta-postu ez finkoetako adjudikaziodunek ez dute baldintza hau bete beharrik izango.

- c) Bere jardueraren izaera berezia dela-eta, ibilgailua etengabe erabili behar izatea. Ibilgailuaren beharra justifikatu egin beharko da. Udalaren irizpidearen mende egongo da aparteko bereizgarria emateko erabakia.

Behar bezala erregistratutako profesional taldeek (gremioek), aparteko kasuetan, euren jarduerarako ibilgailuaren beharra badute, bereizgarri honek

eskubidea emango die araututako zona guztietan aparkatzeko, euren helbide sozialaren kokapen-guneaz gain. Eskubidea emango die, baita ere, egoiliarrentzako araubide bereziko zonetan aparkatzeko, 20:00ak arte.

Aparteko kasuetarako bereizgarriak, ordea, ez du eskubiderik ematen jaiegun eta larunbatetan eguerdiko 13:00etatik aurrera euren zonatik kanpo aparkatzeko. Salbuespenezko kasuetan soilik eman ahalko du organo eskudunak ordutegi horretatik kanpo aparkatzeko baimena.

- d) Udalak jarritako trafiko isunik izanez gero, horiek ordainduta izatea. Arau hau entitate juridiko edo fisiko bereko ibilgailuei aplikatuko zaie.
- e) Jarduera ekonomikoentzako aparteko bereizgarria lortzeko, dagokion Ordenantza Fiskalean jarritako tarifa ordaintzea.

Turismo-ostatuak ere eskatu ahal izango dute bereizgarri hori, baldin eta espazio publikoan aparkaleku-plazarik erreserbatuta ez badute eta ordenantza honek araututako eremuan badaude. Bereizgarri horiek matrikula espezifikorik gabe erabili ahalko dira, eta noizbehinkako bezeroek errazago eta denbora jakin baterako aparkatzeko erabiliko dira. Bereizgarria ostatuaren jarduera kokatzen den eremuan bakarrik erabiliko da, betiere, errotazio handiko eremuetan izan ezik

Jarduera bakoitzeko gehienez hiru bereizgarri eman ahalko dira. Salbuespenezko kasuetan, hiru bereizgarri baino gehiago eman ahalko dira. Kasu horiek bereziki aztertu eta erabakiko ditu baimendutako kudeaketa-organismoak.

Zarauzko Udal Merkatuko salmenta-postu ez finkoetako adjudikaziodunen kasuan, bereizgarri bakarra emango da salmenta-postu bakoitzeko.

10. artikulua. Etxebizitzen jabe edo errentari direnen bereizgarria

Herrira etortzen diren pertsonen euren etxebizitza (jabetzakoa edo alokatua) aparkaleku-zerbitzu arautua duen ingururen batean badute, zona arautuan aparkatzeko baimena emango dien bereizgarria lortu ahal izango dute, tiketa erosi beharrik gabe eta aparkatzeko denbora mugarik gabe.

Bereizgarri hori une horretan indarrean dauden ordenantza fiskalen arabera baimenduta dagoen ibilgailu kopururako izango da. Bereizgarri hori emateko, 15 egun baino gehiago pasatu behar dira herrian.

Bereizgarri hori lortu nahi duten pertsonen ondorengo baldintzak bete beharko dituzte:

- a) Araututako zonaren mugapean inskribatuta dagoen etxebizitza baten jabe edo errentari izatea.
- b) Ibilgailuaren jabe izatea. Probintziako Trafiko Buruzagitzak emandako zirkulazioko baimenean agertzen den pertsona hartuko da ibilgailuaren jabetzat.

Bestalde, ibilgailuaren jabe izan gabe ere lor daiteke, baldin eskatzailea udako bereizgarria behar duen ibilgailuaren aseguruaren hartzailea bada.

- c) Udalak jarritako trafiko isunik izanez gero, horiek ordainduta izatea.
- d) Dagokion Ordenantza Fiskalean jarritako tarifa ordaintzea.

Ez zaie artikulu honetan aurreikusitako bereizgarria emango, TAO zonan aparkatzeko baimena duten ibilgailuen titularrekin batera herriko etxebizitzetan udaldia pasatzen duten pertsonen, salbuespen batekin: eskatzailea eta etxebizitzaren jabe eta erroldatua(k) odoleko ahaideak izatea. Aldez aurretik ahaidetasun hori frogatu egingo da. Edonola ere, ahaidetasuna, gehienez, bigarren mailakoa izango da.

Eskaera, etxebizitzaren jabeak egin beharko du.

10 bis artikulua. Egoiliar ez diren langile eta autonomoen aparteko bereizgarria

Herrian erroldatuta ez daudenek baina bertan lan egiten dutenek aukera izango dute uda partean aparkatzeko bereizgarria eskatzeko.

Hilabeterokoa izango da, eta ezingo da zatitu.

Bereizgarriak araubide arrunteko zonan aparkatzeko balioko du (zona urdinean).

1 zonan lan egiten duten eskatzaileek 2 zonako araubide arrunteko zonan aparkatu ahalko dute (zona urdina).

Bereizgarria indarrean egongo da langilearen kontratuak dirauen bitartean, astelehenetik ostiralera edo astelehenetik igandera, kontratu horren baldintzen arabera.

Bereizgarria eskuratu nahi duten pertsonen ondorengo baldintzak bete beharko dituzte:

- a) Indarrean duten lan kontratua aurkeztea. Autonomoen kasuan, berriz, Zarautzen Jarduera Ekonomikoen Gaineko Zergan alta emanda izatea eta zehaztutako zonaren barruan jarduera burutzeko lokal edo etxe bat alokatuta edo jabetzan izatea.
- b) Ibilgailuaren jabea izatea. Probintziako Trafiko Buruzagitzak emandako zirkulazioko baimenean agertzen den pertsona hartuko da ibilgailuaren jabetzat.
- c) Udalak jarritako trafiko isunik izanez gero, horiek ordainduta izatea.
- d) Dagokion Ordenantza Fiskalean bereizgarria lortzeko jarritako tarifa ordaintzea.
- e) Eskatera urtero berri beharko da.

Irabazi-asmorik gabeko hezkuntza-entitatea edo gizarte-interes argiko entitatea bada, Udalak hango langileentzako bereizgarriak baloratu eta, hala badagokio, eman ahal izango ditu, betiere, 2 zonako egoiliarrentzako gunean erabiltzeko eta ordutegi mugatuan, egoiliarrek aparkaleku horiek erabiltzeko duten eskubideari ahalik eta gutxien eraginez.

11. artikulua. Arautu gabeko zonetako egoiliarren eta inguruko udalerrietako egoiliarren bereizgarria

- a) Zarautzen erroldatutako pertsonak izanik, ordenantza honek arautzen dituen aparkaleku-zonen mugetatik kanpo bizi direnek ere aparkatzeko bereizgarria

eskuratu ahalko dute. Bereizgarri horrek baimena emango die araututako zona batean aparkatu ahal izateko, tiketa lortu gabe eta denbora mugarik gabe.

Bereizgarria gehienez bi ibilgailurentzat izango da, eta **2 zonarako bakarrik**.

Bereizgarria eskuratu nahi duten pertsonak 7 edo 8 artikuluetan adierazitako baldintzak bete beharko dituzte, honako hau izan ezik: ordenantza honek arautzen duen zona berean egoiliar izateari buruzkoa.

- b) Aiako Laurgain, Elkano eta Urdaneta auzoetan eta Getariako eta Zumaiako Meaga auzoan, II. eranskinean zehaztutako katastro-partzeletan erroldatutako pertsonak.

Bereizgarriak ibilgailu bakarrarentzat balioko du eta 2 zonarako.

Bereizgarria eskuratu nahi duten pertsonak baldintza hauek bete beharko dituzte:

- a) II. eranskinean zehaztutako katastro-partzeletakoren batean erroldatuta egotea.
- b) Ibilgailuaren jabe izatea. Probintziako Trafiko Buruzagitzak emandako zirkulazioko baimenean agertzen den pertsona hartuko da ibilgailuaren jabetzat.
- c) Udalak jarritako trafiko isunik izanez gero, horiek ordainduta izatea.
- d) Dagokion Ordenantza Fiskalean bereizgarria lortzeko jarritako tarifa ordaintzea.
- e) Eskaera urtero berritu beharko da.

11 bis artikulua. Tiket bereziak

Udaldian eguneko edo frakzioko tiketak edo tiket bereziak lortu ahalko dira, honako kasu hauetan:

- a) Bizitoki publikoaren erabilera duten establezimenduek, aldi baterako ostatua emateko direnak (hotelak, hostalak, egoitzak, pentsioak, apartamentu turistikoak, etab.), eguneko tiketak lortu ahalko dituzte, araubide arrunteko zonetan aparkatzeko.

Tiket horrekin aukera izango dute establezimendua dagoen zonaren barruan egun osoz aparkatzeko. Establezimenduko bezeroek soilik erabili ahalko dute tiket hori. Tiketak behin erabiltzeko izango dira, eta tiket hori lortzeko, erabiltzaileak kode bat sartu beharko du parkimetroan.

- b) Etxebizitza bakoitzeko eguneko edo 4 orduko kode edo tiket kopuru jakin bat lortu ahalko da. Tiket horrek aukera emango du etxebizitza dagoen zonako araubide arrunteko zonetan aparkatzeko. Tiketak behin erabiltzeko izango dira, eta tiket hori lortzeko, erabiltzaileak kode bat sartu beharko du parkimetroan.
- c) Aldi baterako ostatua emateko ez diren merkataritzako establezimenduek ere kode batzuk lortu ahalko dituzte, aparkamendu arautuaren zerbitzua kudeatzen

duen enpresaren bulegoetan. Kode horien bidez, dohainik aparkatzeko denbora ematen duen tiketa atera dezakete erabiltzaileek.

Tiket hori soilik establezimenduko bezeroek erabili ahaliko dute. Tiketak behin erabiltzekoak izango dira, eta erabiltzaileak egiten duen hurrengo aparkamenduan erabili ahaliko du. Tiketa lortzeko, erabiltzaileak kode bat sartu beharko du parkimetroan. Araubide arrunteko zonetan eta errotazio handiko zonetan erabili ahaliko da, bi orduetik gorako tiketak izan ezik, horiek ezingo baitira errotazio handiko zonetan erabili.

Kasu guztietan, baimen edo kode horiek aparkamendu arautuaren zerbitzua kudeatzen duen enpresaren bulegoetan lor daitezke, **edo enpresa kudeatzaileak jarritako e-mail edo beste bitarteko baten bidez eskatu ahal izango dira**. Baimen horiek lortzeko, eskatzaileak frogatu beharko du jarduera egiteko behar diren betebeharrak administratiboak betetzen dituela (irekitzeko lizentzia, aurrekomunikazioa edo horretarako gaitzen duen beste edozein titulu), edo Ondasun Higiezinaren gaineko Zergaren kopia aurkeztuko du.

12. artikulua. Mugikortasun urriko pertsonen gidatutako ibilgailuen bereizgarria

Ezintasunak dituzten pertsonentzako Aparkaleku Txartelarekin identifikatuta dauden ibilgailuek bakarrik aparkatu ahal izango dute mugikortasun urriko pertsonentzako gordetako aparkalekuetan.

Plaza horiek bertikalki eta horizontalki seinaleztatuko dira, modu egokian.

Plaza horietan aparkatzeko gehieneko denbora-muga 24 ordukoa izango da. Denbora hori amaitutakoan, ibilgailua beste aparkaleku batera mugitu beharko da. Ezingo da aparkaleku erreserbatu berean aparkatu azken aparkalditik 12 ordu pasatu arte.

Honako aparteko araubidea aplikatuko zaie Ezintasunak dituzten pertsonentzako Aparkaleku Txartela indarrean daukaten eta ibilgailuaren titularra Zarauzko udal mugapean erroldatuta duten pertsonen gidatzen dituzten ibilgailuei:

- a) Ordenantza honetako 7. artikuluko a), b) eta c) ataletan jasotako baldintzak bete beharko dituzte, edo, bestela, 8. artikuluan jarritakoak.
- b) Mugikortasun urriko pertsonentzako bereizgarria eskuratu ahal izango dute, eta ibilgailuaren aurreko haizetakoaren barruko aldean itsatsi beharko dute, kanpotik ondo irakurtzeko moduan.
- c) Bereizgarri horren titularrek aparkaldi arautuko edozein **zonatan** aparkatu ahaliko dute –mugikortasun urriko pertsonentzako gorde gabeko plazak– egoiliarrentzat jarritako baldintza berdinetan. Errotazio handiko eremuetan ez da eskubide hori aplikatuko.

13. artikulua. Bereizgarria eskatzea

Ordenantza honetan definitutako bereizgarriak lortu nahi dituztenek egiaztatu beharko dute eskatutako baldintza guztiak betetzen dituztela, eta agiri hauek aurkeztuko dituzte:

- 1) Udalak horretarako jarritako eskaera-inprimakia.
- 2) NANaren fotokopia edo nortasuna egiaztatzeko beste edozein agiri. Pertsona juridikoa denean Identifikazio Fiskaleko Kodea.
- 3) Ibilgailuaren zirkulazioko baimenaren fotokopia.
- 4) Dagokion Ordenantza Fiskalean jarritako tarifaren diru-sarrera egin izanaren ziurtagiria.
- 5) Etxebizitzen jabe edo errentarientzako bereizgarria lortzeko: herri-kontribuzioaren ordainagiria edo behar bezala baimendutako alokairuaren kontratua (Foru Ogasunak ikus-onetsia).
- 6) Jarduera ekonomikoetarako bereizgarria lortzeko: titularrak justifikatu beharko du bere jarduera ekonomikorako etengabe erabili behar duela ibilgailua.
- 7) Enpresaren ibilgailua euren zerbitzura duten gidariek egiaztatu beharko dute, batetik, ibilgailuaren enpresa titularraren eta eskatzailearen artean laneko harremana dagoela, eta bestetik, enpresak baimena eman diola pertsona horri ibilgailua berak eskusiboki erabiltzeko, bai lanorduetan bai lanorduetatik kanpo.
- 8) Mugikortasun urriko ibilgailuen titularrek, berriz, agiri bidez frogatu beharko dute zirkunstantzia hori.
- 9) Garajea araututako zonaren batean jabetzan edo errentan daukaten egoiliarrek ez badute bereizgarririk eskatzen, TRAKZIO MEKANIKOKO IBILGAILUEN GAINEKO ZERGA ARAUTZEN DUEN ORDENANTZA FISKALEAN jarritako hobaria izango dute, halakorik balego. Hobaria eskatu egin beharko da, eta agiri bidez frogatu.

Agiri horiek jatorrizkoekin batera aurkeztuko dira alderatu ahal izateko. Hala ere, Udalak eskubidea izango du beste edozein agiri eskatzeko eta, gainera, ekarritako datuen zintzotasuna egiaztatzeko beharrezko froga eta ikerketak ofizioz egiteko.

- a) Egoiliarrentzako bereizgarria eskatu duenaren benetako eta ohiko bizilekua zein den frogatzea, egoiliarrentzako bereizgarria eskatu duenaren etxebizitzan bertan. Nahitaezkoa eta ezinbestekoa da titulartasuna eta helbidea ibilgailuen udal erroldan inskribatutakoekin bat etortzea.
- b) Ibilgailua ZARAUZKO UDALERRIKO IBILGAILUEN ZIRKULAZIO-ZERGAREN ERROLDAN alta emanda dagoela eta zerga hori ordainduta duela frogatzea.
- c) Legez jarritako epeetan Udalari ordaindu gabeko trafikoko isunik ez daukala frogatzea.

Ordenantza indarrean sartzen denean, bereizgarria eskuratu nahi duten interesdun guztiak beharrezko dokumentazioa aurkeztu beharko dute, eta dagokion ordenantza fiskalean jarritako tasak ordaindu beharko dituzte.

Bereizgarrien erabilerari eta indarraldiari buruz 14. artikuluan jarritako xedapenei utzi gabe, interesdunek lau urtetik behin kudeaketa-organoari behar diren agiriak aurkeztuko dizkiote, haren aurrean justifikatzeko bereizgarria lortu eta erabiltzeko baldintzak betetzen jarraitzen dutela. Hala eta guztiz ere, erabiltzaileari edozein unetan eskatu ahal izango zaio baldintza horietan egunean dagoela berresteko.

14. artikulua. Bereizgarriaren erabilera eta indarraldia

Ordenantza honetan definitutako bereizgarrien onuradunek beren zonako toki libreetan denbora mugarik gabe aparkatu ahal izango dute, errotazio handiko zonetan izan ezik.

Hala eta guztiz ere, egoiliarren ibilgailua espazio berean jarraian aparkatuta edukitzeko gehienezko denbora 8 astekoa izango da, ezinbesteko arrazoiengatik baimen berezia eskuratu ezean, behintzat. Baimen hori Alkatetzak edo, hala badagokio, delegazio edo deskontzentrazio bidez ari den organoak emango du, ebazpen arrazoitu baten bidez. Zortzi aste horiek igarota, ibilgailua beste aparkaleku batera aldatu beharko da. Ezin izango da berriro leku berean aparkatu, azken aldiz bertan aparkatu zenetik 24 ordu igaro arte.

Bereizgarria ibilgailuaren haizetakoaren barrualdean jarri beharko da, kanpotik ondo ikusteko moduan. Bereizgarria baliagarria izango da zerbitzu publikoa indarrean izango den urtealdirako edo, udaldirako emandako bereizgarrien kasuan, zehaztutako eperako. Bereizgarri hori eskatzailearentzat eta eskatutako ibilgailurako bakar-bakarrik izango da.

Bereizgarria jaso duten eskatzaileak izango dira horien erantzule, eta etxebizitza edo ibilgailua edo bereizgarria eduki ahal izateko edozein baldintza aldatzen dutenean, Udalari jakinarazi beharko diote gehienez ere astebeteko epean. Hala, beste bereizgarri bat emango zaie, horretarako eskubiderik izanez gero edo, bestela, lehendik zutena baliogabetuko zaie. Bi kasuetan bereizgarria itzuli egin beharko dute.

Bereizgarria lapurtu edo galtzen bada Udalari lehenbailehen jakinaraziko zaio.

Bereizgarria indarrean izango da, ekitaldi fiskalaren barruan bereizgarriari eman zaion denboraldian. Epealdi hori amaituta, ez du baliorik izango. Hala ere, Udalak, dagozkion egiaztapenak egin eta gero, ofizioz automatikoki berrituko du.

Titularrak bereizgarria berritu nahi ez badu, kudeaketa-organoari jakinarazi beharko dio denboraldi berria (udakoa edo urtekoa) hasi baino lehen, eta bereizgarria dagokion bulegora eraman beharko du.

Bereizgarria ekartzen ez bada, titularra bidegabe erabiltzen ari dela ulertuko da, eta ordenantza honetako 16 d) artikulua araberako ondorioak izango ditu jokabide horrek.

15. artikulua. Betebeharrak

Bide publiko eta aparkalekuetan aparkatzeko, ordenantza honetako 2. artikuluan adierazitako arau orokor eta zehatz guztiak beteko dira, ibilgailuak aparkatzeko seinale guztiak errespetatutako dira, eta, gainera, ondorengo edozein agiri lortuko da:

- a) Oro har, dagokion tasa ordaindu ondoren, aparkatzeko txartel bat emango da, edo ez.
- b) Ibilgailuaren aurreko kristalaren barnealdean jarri beharko da txartela, kanpotik erraz irakurri ahal izateko moduan.
- c) Mugikortasun urriko pertsonentzako aparkatzeko bereizgarria (MM biñeta), ibilgailuaren aurreko haizetakoaren barrualdean itsatsi beharko dena, kanpotik erraz irakurtzeko lekuan.

16. artikulua. Zigor-araubidea

1. Norbaitek ordenantza honen edozein artikulua edo Alkatetzak ordenantzaren garapen gisa ematen dituen xedapenak urratzen baditu, hori trafiko eta zirkulazioko arau-haustetzat hartuko da, eta, ondorioz, zigorrak jarriko dira, legezko prozeduraren bidez.
2. Ibilgailuaren titularrak, hala eskatzen bazaio, arau-haustea egin duen gidari erantzulea zein den identifikatu behar du, eta dagokion prozedurazko tramitean obligazio hori justifikaziorik gabe betetzen ez badu, berari jarriko zaio 16.3.j) artikuluan jasotako arau-haustearen zigorra.
3. Arau-hausteak:
 - a) Aparkatzeko tiketean agertzen den gehienezko denbora pasatzea.
 - b) Ordenantza honetan adierazitako tiket edo txartelik gabe aparkatzea.
 - c) Errotazio handiko zonan berriz aparkatzea, aparkatzeko gehienezko denbora bukatu eta bi orduko epea pasatu gabe, Osakidetzako Osasun Zentroa inguratzen duen errotazio handiko zonan izan ezik. Zona horretan berriz aparkatzeko tartea 30 minutukoa izango da.
 - d) Tiket edo bereizgarri manipulatu, faltsu, baliogabetu edo desegokia erabiltzea.
 - e) Bereizgarrien titularrek ez betetzea helbide-aldaketa edo ibilgailuaren eskualdatzea jakinarazteko obligazioa.
 - f) Ordenantza honetan jasotako bereizgarria behar den moduan ez erabiltzea.
 - g) Bereizgarria emateko beharrezko den betebeharren bat ez betetzea, eta Udalari ez jakinaraztea (horretarako jarritako epean).
 - h) Bereizgarria jaso zuen ibilgailuaren jabetza eskualdatu ondoren ere, haren bereizgarria erabiltzea.
 - i) Ezintasunak dituzten pertsonentzako Europako Aparkaleku Txartelak edo, bestela, mugikortasun urriko pertsonentzako bereizgarria begi-bistan ez jartzea.
 - j) Arau-haustea egin duen gidari erantzulea ez identifikatzea, aurrez eskatuta ere.

- k) Egoiliarrentzat gordetako gunean aparkatzea, zona horretako bizilagunen bereizgarria eduki gabe.
- l) Okerreko tarifaren tiketarekin aparkatzea.
- m) Ordenantza honetan adierazitako beste edozein baldintza ez betetzea.

17. artikulua. Zigorrek eta araubide-neurriak

Arau-hausteak honakoekin bat etorritik zigortuko dira: 339/1990 Legegintzako Errege-dekretua, martxoaren 2koa, Trafikoari, Ibilgailu Motordunen Zirkulazioari eta Bide Seguritasunari buruzko Legearen testu artikulatua onartzeko dena, V. tituluan (5/1997 Legeak, martxoaren 24koak, aldatutakoa); 19/2001 Legea, abenduaren 19koa, 18/2009 Legea, azaroaren 23koa, eta legezko gainerako xedapen osagarrietan eta udal ordenantzetan erabakitakoak.

16.3 artikuluko a), b), c), e), f), g), h), i) eta j) puntuetan tipifikatutako arau-hausteak 120 euroekin zigortuko dira (kopuru hori berrikusi egingo da, eta, beharrezkoa bada, Alkatetzaren Dekretu bidez eguneratuko da). 16.3 artikuluko d) kasua 400 euroekin zigortuko da (kopuru hori berrikusi egingo da, eta, beharrezkoa bada, Alkatetzaren Dekretu bidez eguneratuko da) eta horretaz gain bereizgarria baliogabetu eta 2 urteko epea pasatu arte ez zaio berririk egingo. Horiek horrela izanda ere, ez da eragozpenik izango ondorengoak eskatzeko: ordenantzako tarifetan jarritako prezioak ordaintzea, baita premiamendu-bidea erabilita ere (Tasa eta Prezioei buruzko apirilaren 13ko 8/1989 Legeko 27.6 artikuluekin lotuta, abenduaren 28ko 39/1988 Legeak, Udal Ogasunak arautzekoak, 47.3 artikuluan xedatutakoarekin bat etorritik); eta sor daitezkeen beste tasak ere ordaintzea.

16.3 artikuluan tipifikatutako arau-hausteak trafiko eta aparkamenduen zerbitzu publikoa antolatu eta hobetzeko oztopo larriak dira, beraz, oker okupatutako espazioa berreskuratzeko, udal agintaritzak ibilgailu hori jasoko du, eta horretarako prestatutako gordailura eramango du, ezar daitezkeen zigor ekonomikoa kontuan hartu gabe.

16.3 artikuluko kasuetan autoa jaso egingo da, udal agintaritzak denbora mugarekin aparkatzeko egokitutako lekuetan horretarako baimena ematen duen bereizgarririk gabe aparkatzen bada edo, udal ordenantzan ezarritakoarekin bat etorritik, ordaindutako denbora hirukoizten baldin bada.

Trafikoaren zaintzaz arduratzen diren agintaritza-agenteei, legez jarritako kasuetan, ahalmena izango dute ondorengo kautelazko neurria hartzeko: ibilgailuak bidetik kentzea eta gordetzeko izendatutako lekura eramatea.

Ibilgailua bide publikotik jasotzeko zerbitzuak eta ibilgailua aurreko atalean aipatutako gordailuan egoteak IBILGAILUAK BIDE PUBLIKOTIK JASO ETA ERAMATEKO ZERBITZUA EMATEAGATIK ORDAINDU BEHARREKO TASA ARAUTZEKO UDAL ORDENANTZAN xedatutako tasak sorraraziko dituzte. Ibilgailua itzuli aurretik tasa horiek guztiak ordaindu beharko dira.

Ordaindutako denbora hogeita hamar minututik gora gainditu denean, salaketa baliogabetzeko tiketa lortu ahal izango da, baldin eta ibilgailua jaso baino lehen egiten

bada ordainketa. Ordainketa aurreratua parkimetroan bertan egingo da. Salaketaren ordainketa aurreratua egiteko epea bi ordukoa izango da, aparkamendu-tiketean adierazitako ordua bukatzen denetik kontatzen hasita. Ordainketa arautzen duen ordenantzan jarritako tarifa berezian adierazitako kopurua ordaindu beharko da.

Alkateak edo, hala badagokio, delegazio edo deskontzentrazio bidez ari den organoak onar dezake trafikoaren arloan egiten diren arau-hauste ohikoenen taula bat, bai eta zigor aplikagarriena ere. Dena den, taula horiek modulatu ahalko dira sortzen diren zirkunstantzien arabera.

XEDAPEN GEHIGARRIA

Ordenantza honetan xedatu gabeko kasuetan honakoak beteko dira: ZARAUZKO HIRI-BIDEETAKO ZIRKULAZIOAREN ETA ERABILERAREN ZENBAIT ALDERDI ARAUTZEKO ORDENANTZA (2004ko otsailaren 25ean egindako Udalbatzarrean behin betiko onartua eta 2004ko martxoaren 5eko GAOn, 44 zenbakian, argitaratutakoa); eta aurreko ordenantzaren garapeneko araudia eta gainerako legeria aplikagarria.

Zerbitzu teknikoek txostena egin ondoren, Alkatetzak edo, hala badagokio, delegazio edo deskontzentrazio bidez ari den organoak salbuespenezko araubideak dituzten aparkaleku-bereizgarriak erabiliz aparkatzeko baldintzak aldatu ahal izango ditu, salbuespen moduan, egun jakin batzuetarako, trafikoarekin eta aparkalekuekin nahiz interes publikoko beste egoera batzuekin lotutako arrazoiak direla-eta. Horrelakoetan, beharrezko diren bitartekoak erabiliko ditu, erabiltzaile guztiek erabakiaren berri izan dezaten, eta hala jakinaraziko zaie herritarrei.

XEDAPEN INDARGABETZAILEA

Ordenantza honek espresuki indargabetzen ditu honako hauek:

- Udalbatzarrak 2005eko abenduaren 28an egindako bilkuran behin betiko onetsitako ZARAUZKO UDALERRIKO BIDE PUBLIKO JAKINETAN IBILGAILUEN APARKAMENDUA ARAUTZEKO ORDENANTZA (GAOn argitaratua, 2006ko urtarrilaren 18an, 12 zk.).
- Udalbatzarrak 2007ko apirilaren 25ean egindako bilkuran onartutako aldaketa (GAOn argitaratua, 2007ko ekainaren 25ean, 124 zk.).
- Udalbatzarrak 2010eko uztailaren 28an egindako bilkuran onartutako aldaketa (GAOn argitaratua, 2010eko urriaren 20an, 201 zk.)

Indargabetuta geratzen dira, baita ere, aurreko paragrafoan aipatutako ordenantzak indarrean egon diren bitartean Alkatetzaren Dekretu bitartez egin diren aldaketak.

I. ERANSKINA

TAO ORDENANTZAK ARAUTUTAKO ZONAK (udako eta neguko planoak)

II. ERANSKINA

AIA, GETARIA eta ZUMAIAko katastro-partzelen zerrenda, 11 b) artikulua
ondorioetarako

PARTZELA ZK./Nº parcela	UDALERRIA/ Municipio
649	GETARIA
649	ZUMAIA/GETARIA
639	ZUMAIA
639	ZUMAIA
639	ZUMAIA
649	AIA
659	AIA
669	AIA
649	AIA
659	AIA
669	AIA
648	AIA
658	AIA
668	AIA
648	AIA
658	AIA
668	AIA
658	AIA
699	AIA
6991 (854 ZONA)	AIA
7091 (854 ZONA)	AIA
699	AIA
698	AIA
688	AIA
678	AIA
678	AIA
688	AIA